

Reponderar il scumond da stgaudaments electric direct

La regenza respunda ad ina incumbensa parlamentara da deputà Emil Müller (pbd Sur Tasna)

DA MARTIN CABALZAR

■ **La regenza n'è betg pronta d'acceptar in'incumbensa parlamentara da deputà Emil Müller (Susch) che pretenda ina midada da la lescha d'energia vertenta che scumonda stgaudaments electric direct e limitescha l'accumulaziun ed il consum d'energia netta. Quai malgrà che 44 consegnants han sustegnì l'incumbensa.** Tenor *Emil Müller* èn las capacitads d'accumulaziun la valuta electrica da l'avignir. Gist stgaudaments electric e boilers sajan accumulatur d'energia che sajan sa cumprovads en la pratica e sa manifestads sco vaira al-

ternativa a soluziuns cun battarias. Quests accumulatur èn dentant scumandads tenor la lescha d'energia vertenta. Questa regulaziun dateschia dal temp ch'ins discurreva anc d'ina mancanza smanatschanta d'electricità, manaja Müller. En il fratemp saja capità gist il cuntrari: En l'entira Europa datti electricità en abundanza ed en medem temp ina mancanza da capacitads d'accumulaziun. Tenor Müller na fa il scumond da stgaudaments electric e d'installaziuns electricas directas per stgaudar l'aua da diever naging senn en vista a la situaziun midada sin il martgà d'energia.

Forza idraulica en la crisa

A medem temp stoppia vegnir reponderà il scumond da stgaudaments electric direct. La forza idraulica en general e la forza idraulica grischuna en spezial sajan actualmain en ina crisa profunda che smanatschia sia existenza, accentuescha Müller. Las ovras che n'han betg ina clientella finala che è obligada da retrair lur energia stoppian vender lur energia a pretschs fitg bass sin il martgà d'electricità. A medem temp scumondia la lescha d'energia vertenta da duvrar electricità per stgaudar u per producir aua chauda. Perquai duaia la regenza vegnir incumbensada da midar l'artitgel 10 da la lescha

d'energia en quest senn che la limitaziun da l'accumulaziun e dal consum d'electricità netta vegnia eliminada. Tant pli che las duas pretensiuns correspundan a l'intent da la lescha d'energia che pretenda ina «utilisaziun effizienta, persistenta, economica ed ecologica da l'energia».

Effizienz energetica

Sco la regenza respunda èn ils chantuns tras la lescha federala obligads da relaschar prescripziuns davart il diever da stgaudaments electric da resistenza fixa. La regulaziun, tenor la quala novs stgaudaments electric da resistenza sco era novas installaziuns electricas per stgaudar l'aua chauda en edifizis d'abitar èn da princip inadmissibels, correspundia a la regulaziun da model relaschada dals chantuns. Il motiv saja che la produziun da chalur cun agid d'applicaziuns d'electricità saja ineffizienta. Ina pompa da chalur dovria mo radund in terz da l'energia d'in stgaudament electric.

Substituziun d'energia fossila tras energia regenerabla

Ultra da l'effizienz d'energia aspira la politica actuala da clima ed energia la substituziun dals purtaders d'energia fossila tras energias regenerablas. Questa finamira possia bain er vegnir cuntanschida cun installaziuns electricas da produziun da chalur che funcziunan cun electricità netta. Questa pretensiun na possia dentant betg vegnir realisada en il rom da la legislaziun da construcziun, manaja la regenza.


Provediment segir cun energia electrica

Tenor l'avis da la regenza constati ch'igl èn necessarias avunda capacitads da pre-

staziun ed accumulaziun per garantir in provediment segir cun energia electrica. Plinavant stoppian las raits da provediment esser concepidas cun tranfurmaturs correspundents, uschia ch'ils records da consum pon vegnir ademplids. L'installaziun pli e pli frequenta da stgaudaments electric na guliveschia dentant betg questa curva da dumonda. Per consequenza vegnissan installads cunzunt stgaudaments direct perquai che quels èn blier pli bunmartgads pertutgand l'investiziun en cumparegliazun cun stgaudaments accumulativs. Quests stgaudaments fissan dentant gist quel mument en funcziun (stagiun d'enviern) cur che l'energia da la forza idraulica pudess anc vegnir vendida detg bain sin il martgà. «Perquai sto ina tala regulaziun vegnir considerada sco fallada er ord vista da la forza idraulica», scriva la regenza.

Regenza propona da refusar l'incumbensa

La regenza è cunsienta che il martgà d'energia è actualmain difficil, ella è dentant da l'avis che l'aboliziun dal scumond vertent na possia betg mitigiar questas difficultads. In tal proceder avessia per consequenza che la segirezza dal provediment vegniss difficultada considerablmain, cunzunt durant l'enviern cur ch'ils implants da fotovoltaica e las ovras idraulicas produceschan pouca energia e cur che en medem temp èn en funcziun ils stgaudaments electric. Perquai stoppian ins partir dal fatg ch'i na vegnissan betg installads stgaudaments accumulativs, percenter fitg bliers stgaudaments direct. Resguardond tut ils avantatgs e dischavantatgs propona la regenza da refusar l'incumbensa Müller.



Stgaudaments electric direct duain restar vinavant scumandads.